

von Wulf Wager

Hoiße Urlaubshoimfahrt



Mir warat em Urlaub. En Tirol. War recht schee, wenn au 's Weddr net grad so berauschend war. Aber am letschta Dag hot d' Sonn nomol so richtig schee vom Hemml rabrezelt. Weil i net wia a Müller em Wender ausseha wollt wenn i hoim komm, han i mi no a bissle en d' Sonn glegt.

Leider ben i Huatseml eig-schlofa ond han mr gottsallmächtig da Buggl vrbrennt.

Fascht drei Wocha Reaga ond jetzt so ebbes. Heimatland, dia

Haut hot gspannt, brennt ond waih doa. Aber en Schwob kennt koin Schmerz. Am näggschda Dag, wo mr 's Auto packt ghet hend, semmr losgfahra. Jetzt isch's mir am Buggl hoiß ond hoißer worda. Mir send halbston daweis uf d' Parkplätz gfahra. Dort han i mei T-Shirt razoga ond mei Frau hot mr mit ra eiskalta Flasch Schbrudl da Buggl kühlt. Des hot alles nix gnützt. Sobald i wieder ens Auto eigstiega ond a Weile gfahra ben, isch des wieder hoiß ond hoißer worda. I han mr schier nemme zom helfa gwisst. Des war so o'bacha hoiß, dass mr drzua na no dr Schwoiß en helle Ström da Buggl na'gsaut isch. I han Klimaalg schon uf 12 Grad eigstellt ghet ond mei Frau hot oin Pull-over ond da dicke Reagakittl azieha miassa, aber mir hot dr Buggl äwwl no brennt ond des isch so hoiß gwea, wia wenn i direkt uf ma Grill stracka dät.

Wo mr 's Auto drhoim ausglada hend ond i den Karra en d' Garasch gfahra han, han i's no gsäah: Mei Frau hot, weil's am Vortag so kalt war, d' Sitzhoizong uf volle Pulle dreht ghet ...

Bis näggschdmol

Ihr

Alle Kolumna zom Nochlesa onder: www.woascht.de oder em facebook em Wulf Wager Fanclub